

Heilbrigðisráðherra skoðar framkvæmdir við nýjan Landspítala



Myndatexti; Heilbrigðisráðherra, Svandís Svavarsdóttir skoðar framkvæmdasvæði vegna byggingar nýs meðferðarkjarna ásamt starfsmönnum heilbrigðisráðuneytis, fulltrúum stjórnar NLSH ohf og starfsmönnum NLSH ohf.

Heilbrigðisráðherra, Svandís Svavarsdóttir, skoðaði í dag framkvæmdasvæði nýs Landspítala við Hringbraut.

Jarðvegsframkvæmdir vegna byggingar nýs meðferðarkjarna ganga vel svo og víðtæk gatnagerð á svæðinu. Ný gatnamót við Snorrabraut opna fljótlega. Framkvæmdasvæði meðferðarkjarnans er nú komið í fulla stærð og stefnt er að verklokum þessarar jarðvinnu strax á næsta ári.

Meðferðarkjarninn er stærsta byggingin í uppbyggingu Hringbrautarverkefnisins. Aðrar byggingar eru, rannsóknahús, bílastæða-, tækni- og skrifstofuhús og nýtt sjúkrahótel sem þegar hefur hafið starfsemi. Þá er hafin þarfagreining á nýju dag- og göngudeildarhúsi fyrir starfsemi Landspítala.

Svandís Svavarsdóttir heilbrigðisráðherra: „Það er stórkostlegt að sjá langþráðan draum okkar landsmanna um uppbyggingu Landspítala vera að rætast. Framkvæmdir hér tala sínu máli og færa okkur sífellt nær markmiði okkar sem er að taka nýjan meðferðarkjarna í notkun árið 2025. Þetta er risavaxið verkefni í margvíslegum skilningi sem mun þegar allt er

tilbúið valda straumhvörfum í þjónustu við sjúklinga og stórefla alla starfsemi þjóðarsjúkrahússins okkar.“

Gunnar Svavarsson framkvæmdastjóri NLSH ohf: „Þetta var ánægjuleg heimsókn hér á framkvæmdasvæðið og mikilvægt að heilbrigðisráðherra hafi haft þetta góða tækifæri til að koma, heimsókn sem hluti af stöðugu upplýsingaflæði um stöðu Hringbrautarverkefnisins til ráðherra. Aðalverktakinn hér er ÍAV hf. og hönnunarhóparnir Corpus og Spital hafa séð um ráðgjöf í þessum verkþáttum. Stefnt er að því að uppsteypa nýs meðferðarkjarna hefjist næsta vor en áætlanir Nýs Landspítala ohf. taka alltaf mið af þeim heimildum og stefnu sem fyrir liggur í samræmi við afgreiðslu Alþingis á fjármálaáætlun og fjárlögum hverju sinni“.

Nánari upplýsingar.

Nánari upplýsingar veitir Magnús Heimisson almannatengsla og samskiptastjóri NLSH ohf. GSM 866 1378 eða netfangið magnus@nlsh.is

Ítarefni um meðferðarkjarnann

Meðferðarkjarninn er stærsta byggingin í uppbyggingu Hringbrautarverkefnisins og gegnir lykilhlutverki í starfseminni. Innan hans munu fara fram flóknar og vandasamar aðgerðir, rannsóknir og umönnun sjúklinga þar sem stuðst er við háþróaða tækni og sérhæfða þekkingu. Kröfur um aðbúnað eru sambærilegar og í nýjum sjúkrahúsum í nágrennalöndum okkar. Meðferðarkjarninn er hugsaður út frá starfsemi bráða- og háskólasjúkrahúss, með áherslu á einfalt og skýrt fyrirkomulag ásamt greiðum leiðum milli starfseininga. Meðferðarkjarninn tengist öðrum starfseiningum spítalans með tengigöngum og tengibrúm.

Meðferðarhluti hússins verður á neðstu þremur hæðum þess. Á 1. hæð er aðalinngangur frá Sóleyjartorgi og bráðamóttaka sem leysir af hólmi bráðamóttökur sem í dag eru á fimm stöðum. Á 1. hæð verður einnig apótek og neðanjarðartengingar við núverandi húsnæði spítalans.

Myndgreining, speglaðir, hjartarannsóknir og smitsjúkdómadeild sem og annað aðalanddyri meðferðarkjarnans verða á 2. hæð en þar verður einnig ýmiss konar þjónusta svo sem matartorg, fyrirlestrasalir, smávöruverslanir og upplýsingaborð. Á 3. hæð verða skurðstofur, hjarta- og æðaþræðingarstofur og gjörgæsla ásamt móttöku, og undirbúnings – og vöknunaraðstöðu skurðstofa. Tengibrú verður á 3. hæð yfir í kvennadeild og Barnaspítala Hringsins. Tæknimiðstöð meðferðarkjarnans verður á 4. hæð og þar verður einnig vinnu- og hvíldarrými starfsfólks.

Legudeildir verða á 5. og 6. hæð. Átta legudeildir verða í húsinu og er hverri þeirra skipt upp í þrjár einingar þar sem teymi starfsfólks sinnir að jafnaði átta sjúklingum innan hversrar einingar. Allar sjúkrastofur legudeilda eru einbýli með sérsnyrtingu. Góð aðstaða verður fyrir aðstandendur á sjúkrastofum og legudeildum en í meðferðarkjarna verða þeir sjúklingar sem þurfa hvað mesta umönnun.

Í kjallara hússins verða ýmis þjónusturými sem styðja við klíniska starfsemi hússins. Þar eru meðal annars búningaklefar starfsmanna, dauðhreinsun, framleiðsluhluti apóteks og framleiðsla geislavirkra

Fréttatilkynning 19. ágúst 2019

efna sem notuð eru í myndgreiningu. Þá verður þar ýmis stoðþjónusta svo sem rúmaþvottastöð, ræstimiðstöð, hjálpartækjalager og tæknirými. Frá kjallara verða neðanjarðartengingar til meðal annars rannsóknahúss og háskólabyggingar.

Meðferðarkjarninn er stór bygging með fjölþætta starfsemi. Meðferðarkjarnanum verður deilt upp í fimm byggingarhluta til að draga úr stærðaráhrifum hans á nærumhverfið. Rýmin á milli byggingarhlutanna mynda ljósgarða sem hleypa birtu inn í velflest meðferðar – og vinnurými og skapa græðandi umhverfi fyrir sjúklinga, gesti og starfsfólk.

Ítarefni fleiri myndir.

